

玉  
塵  
新  
譚

耳新序

國朝王元美良史才也而恨  
不居史職以今讀史料一書  
既贍且覈一代之文獻在焉  
埒于司馬子長班固堅居然

季孟之間哉范蔚宗遠不逮  
已而顧以身非史職退然自  
孫子稗官之列夫元美之史  
而云料也誰爲正史者哉乃  
說者謂孟堅漢書多取之劉

子駿襍記蓋子駿博綜西漢  
典故選收精蘊儲其實以有  
待則子駿作之勞而益堅享  
之逸也余少賤耽奇南北東  
西之所經同人法侶之所述



與夫星輶使者商販老成之  
錯陳非一耳涉之而成新殊  
不忍其流遞而湮沒也隨聞  
而隨筆之書成行在且久而  
茲取詳加訂焉以是為可以

質今而準後也庶幾竊比于  
子駿之義以待夫他日之爲  
孟堅元美者豈曰小說云乎  
哉鄧泰素凡兩爲余序而未  
明作者之旨故漫自志其緣

起以告夫世之有耳者

崇禎甲戌秋日信州鄭仲夔

曹師父題



耳新序

猶之耳也人涉之而卽故何  
胃師涉之而日新亦猶之耳  
語耳也人陳之而易厭何胃  
師陳之而四筵驚獨座亦賞



抑自有說蓋余曩耳胄師名  
如轟雷閃電不可得而掩比  
謫居信州亟造廬訪之見其  
貌闇如口呐如退然若不勝  
衣以余所耳與所目抑又異

甚咄咄胄師何視吾以太冲  
莫朕若此已而數數徃叩之  
則言皆玄遠吹氣作旃檀雖  
相得益歡交斯莫逆然而偃  
室罕至又居然有室邇人遐

之風世有異人如胄師宜其  
點染所至成異書哉故夫胄  
師之書無往不足以聳耳而  
新聽也廼獨以耳新一編命  
余闡厥大旨夫耳新之旨莫

詳其自述余何言則亦言其  
簇簇方新者確有原本非如  
世人逐耳根上作生活者而  
已矣胄師嘗拈陳大士與人  
問荅語曰君自無耳何得截

去吾兩耳信斯言也耳新一  
書可以無庸不佞序爲矣胄  
師將無噓乎哉

閩漳友弟楊觀吉題

耳新目錄

卷之一

令德 十則

藹吉 五則

經國 五則

卷之二

正氣 十六則

立言 五則

博瞻 四則

卷之三

集雅

五則

懿好

四則

惠濟

三則

卷之四

神應

八則

仙踪

七則

卷之五

梵勝

十則

同聲

三則

知遇

三則

矜奇

四則

諧艷

三則

卷之六

陳風

五則

紀土

五則

正繆

五則

異述

十三則

時令

三則

今文

三則

卷之七

志恠

七則

說鬼

四則

奸恣

三則

醜媚

二則

災變

六則

孽召

六則



卷之八

物表

六則

兆先

四則

命相

五則

藝術

三則

寶遺

十二則

人瑞

二則

新目錄

耳新卷之一

信州鄭仲夔胄師撰

武林洪吉臣載之閱

令德

王孫謀埴字鬱儀以中尉攝石城王府事權埴  
郡王然秉質端尚造次必于禮教墀戶讀書  
絕粉白絲竹綺紈鮮腆之奉尤喜延接四方  
士以聲氣相悅慕者歲無虛日與人交久愈

篤理藩政積三十年人以寧一著書百有十  
二種皆手自繕寫稿至數易未嘗假手書傭  
易簣前二日猶與諸公子說易指示詩文宗  
尚是夕有星光大如斗墜里中左右闐闐相  
驚告棲鳥皆鳴越二日而公逝南州人士私  
謚之曰貞靖先生有子八人統銀統鉤統鎧  
寶符統罇統鉦統鑲統鑽皆賢而好學世謂  
其遠過荀氏八龍

文太史震孟長洲人至性孝友登壬戌科一甲  
第一聞者相慶以爲純孝之報居翰苑者未  
踰年遂以抗疏忤 旨罷官家居時人爲之  
語曰求忠臣須孝子緊爲誰文文起

朱鬱儀性至孝母俞淑人患瘧下公方同病骨  
立猶強起乞以已年增母算夜夢天神來告  
曰久利氣陷當于香連丸加升麻少許因如  
其言一服而愈

石明府有恒字伯常黃梅人初令遂安再令長  
興所至視民如子一日有盜數十人來刼長  
興庫藏不得怒欲殺公公子孝廉確請以身  
代盜不聽竟害公尋復開圜圍縱諸重囚去  
諸囚曰石公無冤民我輩寧忍以食生負之  
耶盜復欲害確諸囚與之持得免已而喊聲  
大舉盜懼遁去諸囚竟無一人匿走者後公  
喪歸兩縣之民咸來護送如孝子之悼其親

焉

郭孝童金科錢塘右衛人家世勲蔭萬曆丙辰  
六月夜半鄰火突發金科從夢中躍起挾八  
歲弟冒煙出以付鄰人李某已倉皇回顧未  
見其母復欲入李計火燄益烈入必無生理  
乃挽之金科弗聽復蹈燄而入卒與母姚氏  
及二幼弟握手聯肩共斃于火當道破格表  
揚附祀旌德祠孝童時年十六論者以方曹

壽域

李侍御應昇字仲達江陰人方家居被逮報至  
毅然詣解所神色不變或曰合兩判乎荅曰  
吾業以身殉國安能恤家也竟不一反顧李  
制舉稅清超玄勝獨步一時時以方李謫仙  
之詩貌恂恂若不勝衣而臨大節慷慨蹈死  
不變世謂有真文章者必有真人品信哉  
蕭郡尊思似每丁祭必齋宿學宮

介友朱夢得介而絕有識量嘗於戊辰歲舟過  
小孤風濤大作帆索盡絕同舟汪千頃急念  
觀世音垂救勸夢得亦當念夢得謝以時未  
持齋且平日不念今日念將誰欺平時風亦  
小定整帆及大孤風十倍前更雨雹千頃以  
夢得篋中有楞嚴宜升之高處夢得謂篋中  
尚有孔子書及先人集若盡出之時不及止  
出佛經是輕父重師輕此方師重異方師也



不可生死數也毋多一忙頃之達禦兒港焚  
香向水謝口占一絕云白頭浪裏此心閒厭  
說存亡頃刻間暗數平生纔一遍危舟已過  
大孤山其見定識卓如此

養菴大師居鷺湖慈仁特至以德讓化人見者  
咸戀慈雲佛日性至孝父母葬邑之九仙巖  
去鷺湖百里許每歲祭掃必步趨老年艱于  
步始率徒代之先一夜必設茶果致恭敬譙

其徒尋持香數枝拜而授焉其徒旣祭歸又設茶果如初恭敬拜而酬其勞孺慕之情至老益篤如此師嘗遊武夷過接筍崖先時有同鬪髮師兄弟曾捨身于此距師來遊時十年許矣徒衆以告師因泣之慟遂不復遊諸勝次日脩佛事其處師長跪持旛招魂哭之盡哀隨觀者甚衆時有建寧李氏兄弟閱墻者四十年雖同居築墻間其中堂示無復合

理感師所爲不覺相持而泣遂復好如初聞  
人咸嘖嘖師之默化云

余以甲子秋始識建武楊因之其人恬靜寡營  
雅好著述余每過其邸中見其羅列古書呶  
唔不休夜則張燈以讀若不知有煩暑者然  
試事竣余數數相過從方呶唔如故心竊異  
之旣放榜各阻風章江因之過余舟相慰藉  
是夕余復尋其舟與談則張燈呶唔不異往

昔余微窺其神情夷然自適遠同鬪生之無  
愠始益媿且異之與訂交吾豫章卽多才然  
近日率羶于名粗識古書便爾大言夸人謂  
世多空腹咸莫已若至功名之際益不能自  
持矣如吾因之者真讀書真有道人哉因之  
著述甚多而雅不欲出惟筆史行于世

藹吉

龔淵孟與余書稱繆當時之慧而勁文文起之

介而裁姚孟長之莊而密魏仲雪之澹而真  
顧仲恭之深而亮錢受之之寬而奇何季穆  
之精而練王季和之峭而悍俱一面之雄瞿  
元初陸孟鳧許子洽黃子羽綜其才性各負  
偏長龔名立本常熟人慷慨有大志對之令  
人有賈太傅之思

無錫友人馬君常名世奇文中伏龍一時韻  
每科房書有選天下士至奉爲斗極

張魯叟目聞子將卽其人如青霞白雲韻格自

別

建昌之新城近日極爲多才有余友涂子期伯  
昌涂不疑大雋楊因之思本子期冰心蕙質  
其天才邁出無所不可因之沉默嗜古尤擅  
四六不疑有不交天下士枉讀古人書之句  
膾炙人口誦其詩可想見其人

鄒逸少以尊公武輿傳求贊爰綴數語曰余以

戊午得偕鄒子逸少游卽其人勁骨干霄品  
業兼擅非鍾川岳之淑氣者不能天其不獨  
以張鄒氏乎及觀馮侯所爲鄒文學傳何先  
後之掩映也乃家學淵源端不可誣始信爾  
夷之國定多異香黃河之蜿蜒必有其發源  
之自也世咸以文學公不得志于時爲天之  
報施善人者有所未盡嗚呼嗇于厥躬必大  
昌于厥後況以鍾川岳淑氣如吾友逸少者

爲之子哉

經國

鄭中丞教未第時讀書山寺中有啄木鳥日來  
窻間啄樹公惡其聲因以板蔽所啄隙鳥至  
將口于地畫數下板忽墜公異之欲倣其畫  
迹俟鳥去以灰鋪樹底仍板遮之鳥果從灰  
上口畫板復墮公熟其畫乃如前加板以指  
倣鳥迹作畫數板仍墮地後公以中丞勦寇



攻一城久不下還憶其畫法遂輕騎造城門  
以手畫門上門忽自開大軍隨進因獲全功  
公爲余邑人舉成化間進士徵時有目者推  
其命云分茅嶺上埋銅柱古往今來一馬援  
叩之不言其故及公提兵征蠻洞登一峻嶺  
見有鐵柱題曰分茅嶺漢伏波將軍馬援識  
忽思曰吾功名止此矣因別立一銅柱記之  
振旅以歸隨卒

黃少卿清弋陽人起家小吏以清勤累官嘉興  
同知初視塘工海鹽吏抱舊案來自洪武迄  
萬曆初積若山公閱一夜盡其短長明晨卽  
呼吏持去凡上下以舊案質者舉口誦出纖  
悉無遺年月日都不爽築塘時與匠作同甘  
苦課督有法塘成所全活人命甚多至今彼  
中人懷之公初試吏撫院張中丞時徹令主  
文奏忽一日報駕上差人至時世廟於中

外大臣多不測之威張懼及已色沮甚公直  
前曰故事凡有密旨必先令密報所司未  
必爲公公宜復出堂從事若使者從中門入  
是從公發設香案跪堂下聽制如從旁門  
入是必會本院爲他事者也出視爲械郭希  
顏來張神色始定得不失儀退而問曰適所  
云何據荅曰載在會典張服其博雅過人  
周季侯令仁和究心民隱縣有神君之稱嘗出

行忽惟風起吹所張蓋捲落紗帽超回縣并  
蓋人請罪曰小人因張清風遂至冒觸并受  
責周沉思良久曰吾不爾罪乃囑能幹捕差  
二人各予二金令往拘張清風且誡曰出三  
日不能拘至勿復來見也周德信素著捕差  
不敢再請然莫解所從拘延至三日兩人商  
曰捕風捉影世安有此理然明府賞罰誠必  
今日再不能拘何以復其一人曰但沽酒少

寬解更作計耳乃相與登酒樓樓上飲酒數處對席中有談某篤疾諸醫無效將不起一人曰若請張青峯去必有生理二差因細問張青峯狀荅曰其人能回生起死見居某處二差隨潛往其家值張遠出未歸因拘其妻至縣周一見正色訊之曰汝夫平日作甚欺心事婦曰渠本非吾夫吾夫因病請渠調治渠見妾姿容懷不良意潛投毒於巾致夫身

死尋復謀娶妾身妾初墮計不知一日渠酒  
後自吐真情爾時妾卽欲尋死又私念無人  
爲伸冤隱忍偷生至此今幸遇天臺夫冤庶  
伸有日但渠今爲某氏延去若待其歸來聞  
此必潛逃矣須就某處拘之罪人可得也周  
命前差如言往未幾拘至一訊果服遂抵死  
時一縣咸稱快焉

盧子占觀象贛縣人文而善吏工詩歌又嫻爲

懸腕眞草隸時旁及弓馬戈劍之技每舞大  
刀罷輒能作小楷爲人饒膽幹遇不可輒持  
交游最廣居恒一揮千金畧無德色嘗督天  
津郡營北多荒地盧爲屯田以數萬計善談  
兵如聚米爲山虜形在目令人色壯舌卷又  
善治賓客有三夷國使臣至當事以盧主之  
盧依周禮稍緣飾之無不如儀三夷使大喜  
出異楮寶硯賦詩而別

余聞之父老云李明府鴻蒞余邑時極加意保  
民秩滿當遷適潘中使以開鑛至潘隨從數  
百人殊恣橫明府特裁挫之潘初至欲以上  
司自處俾有司叅拜明府往見從中道昇上  
慷慨而前潘憚之與講賓主禮他日潘往視  
鑛塲明府令導者從小徑往崎嶇逼窄至不  
能爲步潘往返疲甚興爲稍減明府乃密報  
當事極陳開封禁之害當事疏請遂徹關中



使然明府亦因此罷官去夫鑛場連三省封  
禁若開利不必歸 朝廷也徒爲吮血磨牙  
輩飽其欲耳而殃被一時禍貽無極明府以  
一官爭之卒賴中止所謂民到于今受其賜  
者也明府吳縣人萬曆乙未進士

耳新卷之二

信州鄭仲夔胄師撰

玉山董思王求毋閱

正氣

建業僧於淮水得一石像儼然大士也取歸置  
一龕以大士崇奉之夜見夢曰吾本翁氏爲  
黃侍中觀妻侍中殉國難吾以不辱節并二  
女投淮河身死淚血漬石遂成此像今以大

士崇奉我令我踧踖不安耳盍正之明晨僧具以夢告人始知像乃黃侍中夫人翁氏也友人陳士業以丁卯遊南都曾見其像其語余如此

李仲達亡前一日手書誠予書曰付遜之見手筆吾直言賈禍自分一死以報朝廷不復與汝相見故書數言以告汝汝長成之日佩爲韋弦卽吾不死之日也汝生於官舍祖父

毋拱壁視汝內外親戚以貴公子待汝衣鮮  
食甘噍喜任意驕養既慣不肯服布舊之衣  
不肯食粗糲之食若長而弗改必至窮餓此  
宜儉以惜福一也汝少所習見遊宦赫奕未  
見吾童生秀才時低眉下人及祖父母艱難  
支持之日也又未見吾今日囚服逮及獄中  
幽囚痛苦之狀也汝不嘗膽以思豈復有人  
心者哉人不可上物不可凌此宜謙以守身

二也祖父母愛汝汝狎而忘敬汝毋訓汝汝  
傲而弗親今吾不測汝代吾爲子可不仰體  
祖父母之心乎至於汝母更倚何人汝若不  
孝神明殛之矣此宜孝以事親三也吾居官  
愛名節未嘗貪取肥家今家中所存基業皆  
祖父母苦苦積累且吾此番銷費大半吾向  
有誓願兄弟三分必不多取一畝一粒汝視  
伯如父視寡孀如母卽有祖父母之命毫不

可多取以負我志此宜公以承家四也汝旣  
鮮兄弟止一庶妹當待以同胞倘嫁於中等  
貧家須與庄田百畝至庶妹毋奉事吾有年  
當足其衣食撥與贍田收租以給之內外出  
入謹其防閑此桑梓之義五也汝資性不鈍  
吾失於教訓讀書已遲汝念吾辛苦勵志勤  
學倘有上進之日卽先歸養若上進無望須  
做一讀書秀才將吾所存諸稿簡籍好好銓

次此文章一脉六也吾苦生不得盡養他日  
伺祖父母百歲後塋我於墓側不得遠離

侯給諫震賜性骨鯁乙丑入都門子峒曾以會  
試隨侍僦寓數椽已逾三月忽魏璫遺帖致  
意勿復取直驚問之知此舍新屬忠賢矣給  
諫艷然不應亟移居會館中忠賢繇是恨之  
尋罷歸

浙江巡撫首建逆祠請文於樊學憲良樞樊科

疾不出者兩月乃更請於顧輔樊聞始出行  
文他郡又閱數月祠成各官趨謁或諷樊宜  
往乃稱舊疾更作卽日掛冠歸

耿副使如杞以不拜逆祠被逮登檻車滿城官  
吏士民哭聲震野送至百里外

高中丞攀龍以糾劾權奸被削回籍杜門著書  
忽聞緹騎至焚香沐浴手寫疏一通整衣冠  
望闕拜畢自投于園池遺疏云臣雖削籍舊



屬大臣大臣不可辱辱大臣則辱國矣謹北面稽首以效屈平之遺君恩未報願結來生閭中有士人魏姓者佚其名憤魏闔恣擅耻已與之同姓乃去鬼稱委彼有儼然朝紳而稱祖爺稱殿爺與夫稱公誦德雷同附和者聞此直當羞死耳

魏大中就逮時道出常州知府曾櫻泣送大中顏色不變謝之曰臣子死於王家男兒常事

何必爾爾贈以百金堅辭不受曰譬如嫠婦  
孀居數十年垂死中偶動一念便屬失節簪  
華而不敢不易也及受殊刑未死以蓆卷支  
體倒豎之如是三日啓視目精猶自炯炯其  
子學沂扶柩歸家一慟而絕

周吏部順昌聞逮卽收束書帙拜別宗祠禁止  
妻孥哭泣毅然登車及下鎮撫司極刑捶楚  
骨斷皮開血濺肉飛身無肌理周齧指睜目

不作一哀泣聲惟罵不絕口臨死具短章祈  
以屍諫不果後家人領埋時皮肉已腐止存  
頭顱鬚髮英氣凜冽尚自逼人

黃尊素剛介不阿氣節凜然入烏臺侃侃直言  
以觸權奸罷歸賦詩讀書偶過西湖遊時向  
人雄譚不畏時忌娓娓及之厲聲唾罵偵事  
者聞之織璫遂與周李諸賢俱遇害

周侍御宗建三疏發逆不爲羣兇所容逮獄時

備極慘毒而斃訃音尚未至家也有舟子於  
清江浦接一秀才來雇舟許價一金問姓氏  
暨所從來荅云我周季侯也自京師出舟子  
因問吳中諸大臣逮京狀秀才顰蹙曰俱死  
甚慘甚慘更問魏監秀才曰伊罪惡貫盈不  
久被顯戮矣至吳江秀才曰爾卽相隨往我  
家取金舟子如言至一大家門秀才先入待  
久不出舟子頻聲促之一管家出問何因來

此舟子具言故管家曰此吾至人名字渠前  
被逮赴京今存亡未卜安有附舟之事正喧  
嚷間夫人急出問故管家將舟子語備述夫  
人曰良然良然昨夜半夢侍御來家自稱逮  
京後備極苦刑以死上帝鑒其忠直俾爲神  
蘇州今自清江浦附舟歸許以舟資一金明  
晨來取當與之不可令我食言夫人言未終  
號泣不勝舉家聞之皆哭舟子亦哭與舟資

固不受夫人曰侍御生而特介汝不受直是  
令其死後有諾責也舟子始肯受謝曰不惟  
侍御精忠貫日夫人亦且大義凜然一門正  
氣乃爾因再三歎息而去

李侍御應昇爲曹欽程所構害曹後罷歸遂不  
爲鄉人所容江州南康所至爭唾其面乃買  
宅湖口縣湖口士人相與屏逐之奉李神主  
於其中顏曰李仲達先生祠

首發魏璫滔天十罪者貢生錢嘉徵也疏上海  
內傳寫一時紙爲之貴先是監生陸萬齡等  
誦莽功德請建祠于國學中聞者無不唾罵  
錢陸俱嘉興人而一竹素傳芬一士林播穢  
其相越如此今巨奸旣殲陸萬齡諸人并治  
氷山之倚見睨曰消而正氣之存居然千古  
君子立身可以知擇矣

通祠在蘇州者聞有 旨拆毀有一人當先入

劈碎魏忠賢首懷之而去衆阻之其人曰吾  
生不能啖其肉寢其皮今將沉香首碎碎劈  
開燃向各忠臣面前庶快人心耳

薄少君長洲人婉孌有節操歸于沈文學承沈  
名噪海內而不得售以卒少君哭以詩百首  
辭韻愴烈明歲忌辰方酹酒遂一慟而絕  
魏學濂是太常次子痛父兄之慘死乃刺血上  
書陳寃遂得贈恤



立言

善爲文者觀天之道類物之情廣稽乎西藏之  
秘冥探乎巧智之淵煥煥焉炳炳焉渾渾焉  
噩噩焉澤于理審于則凝于氣琢于辭澤于  
理則不膚審于則則能訓凝于氣則不佻琢  
于辭則有觀不可以一家名不可以一端測  
夫是之謂至文蜂之爲房也周于采采或花  
之藥或露之英或水之液或人身毛孔之所

出以至于滓穢之精和焉而有蜜而不能以  
虧其一方比其成也無花露氣無水氣與夫  
人身垢滓之氣夫孰辨其所從成酒之釀也  
漬米而烝之稻黍爲君麴蘖爲使數日而米  
汁出焉夫乃揚醜其糟粕而無所用茹其精  
也達斯二者其于文章之道思過半矣俗文  
則不然理不足以周衆法不可以自閑氣不  
能以御游辭不足以暢志自命以爲奇而耳

食者遂相與尸祝之揚述之離經畔訓蔑範  
毀型食人之心志而莫之或罪蜂之蠟酒之  
滓夫又何則焉

詩有集唐集古余友朱鬱儀諷古十首乃更集  
諸子鎔鑄之巧妙極自然非胸中有萬卷書  
筆下無半點塵者安能爲也雷司空暎謂其  
稟龍沙聞氣而出又謂其不神不仙而以著  
作結爲大年誠然

費文孫弱冠時擬騷著仙問余愛其辭以書扇  
今更識於此曰青牛何來流沙何指何玄牝  
之門爲天地根而谷神初何以不死何彼靈  
女都而且閑何抱彼一絃周遊九天人生幾  
何期焉易迫何壽彼彭鏗終焉八百回焉何  
夭距焉何壽何作惡以逢祥作善以罹咎何  
所不死何所有藥靈根何固朱華何落木公  
何笑金母何修何蟠桃不易結而曼倩三儉

蓬瀛旣邈夫誰造焉方壺旣廣夫誰往焉取  
彼童男巡遊海上胡乞彼良藥終焉以喪通  
天何高金莖何長玉屑何佳清露何涼文成  
焉死五利焉誅胡算不能延卒以伏辜雞窠  
何許容彼小兒胡爲飲食不能飽而吸彼人  
乳白雉下錫穆何取青鳥致貽武何喜焉得  
廣樂張於帝幙焉得瓊卮宴於瑤池爰有天  
台婉彼二女孰期在斯得兩男子靈寢何浮

斗牛何入何置彼女紅惠夫機石長房何術  
取夫竹筇胡目不肯閉終焉化爲龍采芝煉  
藥何所修嬰兒姪女何所求何意彼人間而  
信有丹丘

余友鄒逸少名啓衷爲人倜儻真摯刻意嗜古  
尤工詩鬱儀宗侯嘗評其風力邁舉位之高  
岑王孟間若其時原有一鄒逸少者于時以  
爲知言

文之摹古者世輒嘲之謂是優孟衣冠夫優孟  
衣冠徒刻畫于形似終遜真神耳誠得其真  
神使仲尼不死顏子如生又何病焉易不云  
擬議以成其變化宣聖不云述而不作乎且  
先天一畫而後皆擬議也患擬之而不合不  
聞合而病于擬卽邇來牛鬼蛇神之習亦是  
互相倣襲吾謂摹叔敖衣冠猶賢于襲市徒  
乞兒衣帽况又張公帽作李公裝乎

博瞻

朱鬱儀博綜多聞著述之富百倍中壘而謙抑  
好士不欲以所有加人每館閣中遇故事隱  
僻者貽書相問輒裁荅如響

俞國聲琳信豐人爲鬱儀王孫舅氏博洽多聞  
尤敏捷疆記手錄子史百家言每篇畧抄起  
句下卽接以云云或間錄數句復接如是人  
問故荅曰我所記憶者不欲復贅耳俞嘗爲



學博值中秋節諸司道倍御史宴御史命題  
賦詩僉一夕作七言律百首次早持獻使事  
工切如出夙構御史一讀一歎賞欲特剡薦  
之僉耳重聽先是所親謂曰君對官長時第  
視其開口隨唯唯可無重聽之嫌僉然之會  
獻御史詩出謁一叅藩叅藩謂曰君如此才  
高真不減班馬僉連聲稱是叅藩恚之言于  
御史謂其驕傲異常遂不得薦竟以此罷官

去

天啓甲子閩中顏茂猷以五經應鄉試故事闡  
牘越格者不得膾紅時監臨喬公憐其才命  
止膾本經遂爲本房祁司李所拔旣放榜典  
試顧太史董給諫覆取其四經閱之俱淹貫  
深奇之閩人爲之謠曰商君昔日誇三捷顏  
子今朝說五經可謂有奇學有奇膾又有奇

遇

張文學士鵬字子翀鉛山人博雅耽奇湛于經  
術應試豫章嘗三收而復棄人咸爲扼腕子  
翀故自若也益肆力古學不輟今贗古競售  
而真實學問如吾子翀者竟脩文地下彼蒼  
者天殲我良友念之悼歎無已也

新卷之三

信州鄭仲夔胄師撰

南州萬時華茂先閱

集雅

余弱冠好言詩遍搜古今諸體精輯成帙各爲  
一序與得早了八股緣當更定以傳今陳之  
篋中十年許矣困踣日甚慙負居諸偶披往  
序其品隲庶幾於作者不大相謬覺爾時已

知所裁也漫識于此古詩序曰余少受三百  
篇言而知詩之所爲詩也三百篇之外吾端  
精古詩對之靡倦廼說者謂五言始蘇李稍  
變風雅之舊謂之古者猶有古之遺也卽今  
觀蘇李詩與其所爲十九首質而宕婉而多  
風政使千百載之下穆然咏歌庶幾想見其  
人夫能使千百載下如見其人者此真得風  
雅之宗者也操觚之士人自矜一隋珠薏挾

幽玄以赴其所欲至而有至不至者則世趨  
使然耳是故漢詩所謂威儀棣棣不可選也  
吾錄其瑜之瑜魏詩瑕者什之二三瑜者什  
居八九吾舍其瑕以成其瑜晉詩瑕瑜參焉  
爲之存其瑜不得不汰其瑕宋齊梁陳隋北  
朝詩瑜一而瑕百則亦稍示存羊以備一代  
之體製而已昔人評肉勝竹竹勝絲以其漸  
近自然夫惟知自然之解者始可與言古詩

也夫唐詩序曰五言古詩之衰自劉宋始至  
隋而濫觴極矣唐稍振之而排偶之習未盡  
脫去卽其佳者僅足板晉視漢魏滋遠矣七  
言古詩唐多作者高適夫遂爲冠軍太白天  
才騰逸咳唾成珠絕句之美冠絕三唐少陵  
工諸律體所自云性癖耽佳語必驚人大而  
非夸也廼絕句非其所長王右丞岑嘉州之  
七言律足與此玉至七言絕句太白而外亦

屈指二君他如王龍標賈舍人之作逸致騁  
翺哉選唐詩者無慮數十家率不免意爲去  
取至如寒暑之異候而東西之易面而馳吾  
寧必人厭作者意乎立乎中央不言而四時  
之氣咸備則茲選所爲極難耳明詩序曰明  
詩必首稱濟南濟南有諸家之長而不必盡  
其長也五言古詩何仲默駿駿魏晉間作者  
于鱗則居然漢風哉吾無能名其所至已七



言古詩氣格稍遜於唐蓋雁行少陵者有之  
竝驅高達夫目所衆睹卽信陽濟南難之况  
其他乎五七言排律六言詩要不乏人七言  
絕尤多佳句五言律體博焉而不精吾所取  
者高岱諸什猶有開元大曆之遺五言絕句  
篇章寥寥蓋諸家易之反得難焉至七言律  
詩則觸目見琳瑯珠玉政如王謝子弟優者  
龍鳳劣者虎豹洋洋乎盛世之音哉要以此

道無兼諸尺有所短寸有所長彼之不能爲  
此猶此之不能爲彼也囊括古今兼總輦振  
其在繼起者乎其在繼起者乎

劉誠意春興詩會稽南鎮夏王封蔽日騰空紫  
翠重陰洞烟霞輝草木古祠風雨出蛟龍玄  
夷此日歸何處玉簡他年豈再逢安得普天  
休戰伐不令竹箭困輸供雄偉悲壯方之杜  
少陵秋興工力悉敵

李侍御應昇直言敢諫屢疏論劾權奸申救建  
言諸人逆璫怒褫奪而歸及詔獄起駕帖至  
奮身就道登舟倚馬每得句擊節自賞無悲  
愁悵鬱之色途次詩不能盡述述其尤者十  
三首以傳其郡中別徐元修曰相逢脉脉共  
懷傷訝我無情似木腸有客衝冠歌楚調不  
將兒女淚沾裳其二曰南州高士舊知聞如  
水交情義拂雲他日清朝好秉筆黨人碑後

勒遺文丹陽道中曰已作冥鴻計誰知是僂  
民雷霆驚下土風雨泣孤臣憂患思賢聖艱  
難累老親生還何敢望解網頌湯仁其二曰  
聖德方虛已愚忠敢瀝丹慙無一字補空復  
數行彈臣罪應難赦君恩本自寬淒淒楊  
柳色誰爲問南冠大兄同行因憶五弟曰勞  
人車馬日追隨一髮餘生不可期回首轉嗟  
鴻雁影斷腸初信鶴鴿詩白雲渺渺迷歸夢

春草萋萋泣路岐寄語兒曹焚筆硯好將犁  
犢聽黃鸝述懷曰便成囚伍向長安滿目塵  
埃道路難父老驚心呼日月兒童洗眼認衣  
冠文章十載虛名誤封事千言罪業禪寄語  
高堂愁苦憶朝來清淚飽供餐鄒縣道中聞  
有問予名而下淚者口占一首曰身名到此  
卑張儉時勢于今笑孔融却恠登車攬轡者  
爲子灑淚問蒼穹鄒縣道中有感曰春申好

士祗虛名勢利遺風古道輕不見彈冠舊膠  
漆驅車相避隔林行書驛亭壁方壽州詩後  
曰君憐幼子呱呱泣我爲高堂步步思最是  
臨風淒切處壁間俱是斷腸詩景州道中感  
懷曰細數知交在逍遙各一方魏齊方睥睨  
阮籍一猖狂形影悲相弔音書夢已荒古人  
不可作搔首問蒼蒼宿村店曰日暮停車塵  
滿衣誼譁土語是還非祗憐歸夢三千里不

及呢喃燕子飛良鄉呈大兄曰長途連袂若  
爲歡咫尺京華不忍看此去幽囚腸百轉總  
餘清淚對誰彈其二曰北地風沙到始知那  
堪病骨苦支持從今用晦艱難甚莫遣離憂  
減客肌諸作讀之字字酸楚何必減屈平離  
騷也

亡友汪恭仲樾貴溪人嘗有南屏三子詩清新  
俊逸不媿作者因錄之以傳同好三子者鈐

山費文孫雲仍玉山董求母恩王及余不佞  
也其詠文孫者曰文孫何翩翩負氣凌霄漢  
披覩蘭蕙芳揆藻雲霞爍當窻振逸響時名  
走淆亂識曲僞傷懷咄嗟誰獨捍慷慨憶同  
心深衷託任誕長嘯若爲狂沈醉一似玩榮  
名等濁醪斗酒十千換願爲晨風飛凌虛翔  
浩瀚豪爽不自持徙倚增累歎此意知者稀  
長夜何時旦詠余者曰阿龍故自超婉婉揚



眉宇世多噉名人之子心獨苦天地亦寥落  
而乃厲高羽辭賦逼西京先秦以爲許悠悠  
千載事流俗非所伍長佩岌高冠朝蘭夕宿  
莽嗟哉薄世人披榛久無覩中心悵有求著  
述常扃戶斯文良未喪吾道維其主清商一  
曲奏凌厲空千古詠求母者曰董生起懷玉  
齠齡籍名士十六入都門香名滿燕市高視  
薄雲霄俯瞰當途子揆藻江河傾結撰雲霞

起斗酒日百篇靈恠效筵几雜糅謂不芳  
紛滋蘭芷馨香滿懷袖琅玕襲其裏徘徊  
吾黨間鴻軒亦鳳止識察信脩姱局促悲  
下里良宴具陳歡時名誰復爾

武林友人朱子玄名天璧年少而才雋提  
衡枕苑價重汝南之評詩取裁於古不愧  
作者嘗寄贈余一律云蒹葭白露望洪州  
如置元龍百尺樓塵下清言來紫氣篋中  
質草渺丹丘

共憐湖海千秋骨獨富文章萬石舟誰道名  
高天必忌臥龍飛卽是通侯此詩置王右丞  
韋蘇州間真堪伯仲也

懿好

蕭穎士家傭杜亮幕主博與至其筵楚而不去  
趙至年十四隨車問嵇康姓名卒走數百里  
從學此二子真功曹中散知己也今世卽有  
蕭之博學嵇之高韻人且不必識安知慕乎

王侍郎廷極重黃少卿清少卿叅軍利州衛王  
家南充相距凡數日程念黃不身萬里外每  
歲除遣長公續之次公屏之以次陪歲至燈  
後始別去

楊大中丞璉被逮時士民仗義叩官旂欲奪之  
德安城外集至數萬府道開諭不散楊帶刑  
叩頭乞父老勿噪恐累族誅然後風解各州  
縣爲私禱生還者至數百處士民送之就道

者以萬計下至萊傭乞兒等咸爭持一錢以助贖譴官旂亦感泣爲出資設醮禱於關帝廟河南經過州邑無不爲之請禱自備資糧送至黃河者以千計

魏忠賢旣敗諸臣死忠者竝得昭雪特加贈廕高攀龍贈太子太保兵部尚書周起元兵部侍郎周順昌太常寺卿楊璉左都御史吳裕中太僕寺卿萬燝光祿寺卿周宗建黃尊素

李應昇夏之令俱太僕寺卿繆昌期正詹事  
仍各廕一子左光斗右副都御史魏大中太  
常寺卿周朝瑞袁化中劉鐸顧大章俱太僕  
寺少卿高司馬楊左都俱與祭二壇造墳安  
葬周兵侍左副都俱與祭一壇吳太僕萬光  
祿周太僕黃太僕李太僕夏太僕繆詹事魏  
太常周太僕袁太僕周太常俱照品祭葬劉  
太僕顧太僕亦設一祭海內聞而快之

惠濟

信郡南瀕大河爲八閩通道先是止有三十六  
浮橋以通往來每歲春夏間大水泛漲民病  
干涉至辛酉蔣郡尊蒞郡慨然念之乃請明  
通上人造石橋焉因題之曰鍾靈橋至民間  
私稱則曰蔣公橋或曰明通橋而已蔣公名  
如奇宜興人在郡清操冰潔多惠政士民懷  
之明通在持興安之岑山洞以普濟爲佛事

尤善于造橋出入策一蹇驢已乘則驢踴躍  
疾走他人欲乘則顛翻使不得騎

喻鵬南昌人上長安謁選時夢數萬人乞救隱  
隱如在水中央莫知其解時靈璧歲苦河溢  
蕩析民居漂沒者千人漕河使者憂之疏請  
崙設主簿駐靈璧之雙溝獨理河務自萬曆  
癸酉至丁丑因河溢五年內五易其官悉坐  
以法喻蒞任初禱于河神乃旣厥心以利導



自是河水寧謐者三載當道特疏薦加銜縣  
丞仍督河務又三載寧謐如前當道復薦之  
遷蕭縣知縣仍督河務尋以內艱歸歸之日  
輒夢數萬人作叩首謝狀其卽向者乞救于  
長安道者乎靈璧人豎碑建祠祀之

姚京兆思仁秀水人萬曆己酉患熱病五日不  
蘇魂忽離體信步而行見城郭車馬人物一  
如人世惟陰靄無光氣象慘淡至一宮闕前

多罪人桎梏遂闖入宮門歷堦而上鬼卒列堦左右姚上堂至殿見閻王冕而登座長揖不拜王起舉手相揖姚因請爲已較勘善惡王命主者持簿勘之姚名下所注惡卽一念之動皆書姚曰此未嘗爲何爲書王曰未爲名爲過已爲卽爲罪不可解矣幸子生平醇謹無大過惡及閱善簿其大者如題山左之水災救河南之開鑛奏疏一一具錄至己亥

歲畿南大荒姚上疏請米三十萬賑濟列爲  
大善姚謂王曰此疏仁僅具名疏稿乃賀燦  
然筆也善當歸賀王曰疏出君名萬一得罪  
賀當之乎歸君爲是姚索賀籍王曰賀無子  
今與一子足報之矣卽舉手相別姚遂甦次  
日起居如常賀久艱於子至來歲果舉一子

耳新卷之四

信州鄭仲夔胄師撰

虞山龔立本淵孟閱

神應

余不慧不諳相地乙丑歲欲買山塋孟儒兄尋  
得林家源塢塘山地余齋戒叩關帝祠祈籤  
以決得五十九籤詩曰事端百出慮雖長莫  
聽人言自主張一著先機君記取紛紛鬧裏

更思量余茫然不曉所指因再懇祈直示得  
第二籤詩曰盈虛消息總天時自此君當百  
事宜若問前程歸縮地更須方寸好脩爲余  
私喜有縮地字是必有地也歸而揭貲買之  
比遷穴相地家或主祭丁或主壬丙余未能  
決內弟方立之直前曰宜質之靈前以定因  
焚香拜祝拈得壬丙始悟籤詩方寸好脩爲  
方寸者爲方十一也蓋內弟行十一藉其一

言以決云又方寸爲心贊用壬丙者陳心燭也葬時衆議猶不一余則決意用壬丙所謂莫聽人言自主張也然縮地二字尚不甚解他日客有指前山爲可用者陳云是爲我用山蓋三山齊出縮者爲尊此其縮者也余始恍然縮地之義而嘆且異于籤詩之奇驗矣神明有赫不啻耳提彼紛紛妄度者胡爲哉辛酉春弋陽陳某有耕牛爲人盜去陳家特窘

甚俯仰無措因泣訴之城隍神越三日盜牛者忽狂語曰城隍差人拘鎖可救我其家多人護持之都聞鐵鎖聲次日復然隨責杖數十其人叫痛不已衆又咸聞杖聲

神宗時有大臣出使琉球艤舟海濱登岸閒步至一烈婦祠見金鑄鑪約三百斤許因取置舟中行不數里風浪大作舟幾沒衆驚詫咸謂取鑪所致亟以投之海中風浪隨息舉舟

無恙

皖城謝文學中一偶病作召諸親友永訣曰余  
開帝香童也今日某時將還解梁親友皆以  
爲誕是時果異香滿室聞數里謝遂長逝後  
數日有一僧自解梁還遇謝于途更有文學  
陳遵一并兩牧童皆僧素所熟識者僧抵家  
初不知謝卒也語諸鄉人更詢陳與兩牧童  
俱一時卒始嗟異之



王司李夢暘字旭東爲余師遐仲先生尊人以  
安慶司李署潛山時境內苦虎患白晝嚙人  
前令嘗督民設捕而嶠負勢張捕者莫可誰  
何公蒞政卽齋沐自爲文禱神云苛政猛於  
虎政而苛也神且以虎嚙我何虐百姓若其  
苛未也則神血食百姓不能扞焉而俾其析  
骸委肉以啖諸獸吻其謂神何禱已卽下令  
境中如前設捕不旬日得虎十餘虎皆自齕

縋罟帖服類羊豕若有所爲鉗其牙極其爪  
鞭其背而驅之亡敢跳者有一虎薄網睥睨  
不欲進獵者從旁大呼曰吾奉王公令來收  
而屬以奠我百姓而屬悉就械矣而睥睨何  
爲者虎若省人語躍入網潛民自是不復虎  
患又部民有盜者公訶得之盜以亡驗執不  
服公釋之而庭數曰若盜真也吾釋若若幸  
自新不者神不若宥釋三日而盜死部民益

信公爲神明焉此與捕虎事同奇并志之

劉中丞岳皖城人錫得一刻木神能言無事不  
報劉督學浙西時神忽告以某日將有倭變  
至期果有報遂閉城神又告以城外人不  
入者不下數十萬請開城放之劉有難色神  
曰是無害倭尚有三日不至公寧單騎出城  
救之勿遲劉從其言城外人盡入城劉處後  
神又曰倭至矣請急進斷橋使不得度橋斷

而倭至劉得入城神又告以倭船臨城下攻城必無幸須急召毛閩使可解也召毛至果出奇計倭船盡沒海底圍立解

監生陸萬齡解刑部時在聖廟前經過日將瞑忽見澹臺先生及周程二先生都在廟前指萬齡罵曰此人欺侮先聖澹臺先生曰因汝倡邪議建逆祠峙聖廟致江西各處聞風效尤將吾黨木主丟在泥坪上我抱千金之璧

不懼蛟龍何有于爾輩及魏忠賢哉但我君子不與小人鬪力明珠不與瓦礫相觸矣萬齡正欲匍匐伏罪則已不見遙望惟紫雲瑞靄而已

戊辰二月八日鉛山縣三十七都有顯應壇三聖忽附兩年少披髮徒跣用紅布裹額身衣神袍手執小網又在本部擒獲盜八名盜或扮施藥或扮唱道詞或扮乞丐人不識其爲

盜也兩人直前擒縛盜來相持撲殺一人餘  
七人擒至縣捕官聞之隨出堂拷訊兩人作  
神言曰此賊大有法術非人力所能拘捕須  
急請令公來重究時攝縣事者興安江大尹  
也偶未在縣捕官將盜收監飛遞報江公遂  
送神至廣濟倉三聖壇神于香案上站立次  
早江公至偕各屬官詣拜隨請至縣堂設公  
案上坐江公取盜出嚴刑拷問盜招稱係紅

巾餘黨曾在福建劫王家因彼處緝捕甚急  
本月初五日潛逃至此內有三人曾經刺臂  
搜出一包裹有塗面顏料并引火物審畢神  
令仍收監且囑云此賊不可與點水若見水  
便遁去矣吾費神通擒若輩不可輕覷言訖  
辭歸江公令衆鼓樂送神還本都舊壇其  
應如此

仙踪

宜黃鄒逸少家藏桃源圖相傳十九世祖名極  
者登宋治平進士有道人自稱姓回數來謁  
一日問公欲遊桃源否極曰是仙境那可到  
耶道人以手劃壁成一大圈內有朱扉樓閣  
人物鳥獸山川草木道人先躍入其中以手  
招極極欲偕夫人同遊忽覺圈漸小夫人出  
忙以羅裙印之遂成畫圖一幅其圖晴朗時  
不甚見稍雨視之纖悉畢具人物大僅如粒



而鬚眉宛然真仙筆也

呂貧子有道者也南宋時流寓永豐結菴于三官道院後隱居六十餘載後歿葬于道院之右既二年邑人有謫戍河南者道遇之相語平生共飲於酒家至暮曰吾送若歸令閉目久之忽聞雞犬聲振衣而起抵家漏下纔三鼓耳縣尹詰其歸速之故爲具述尹使人發其墓止遺像詩讚與二草履在焉履隨化雙

鶴飛去遺像供奉觀中傳至明天順間爲郡  
守金鉞所得惟詩讚留傳人間讚曰福田多  
處作孽多福田少處作孽少我是無福人無  
福無煩惱一箇破燒瓶一領破衲襖一不憂  
生死二不憂賊盜平心待物去候他時日到  
假饒不作仙也證菩提道又讚曰不管金烏  
西墜任他玉兔東升住則閻浮且住去時撒  
手便行詩曰六十年來此地居靈臺光映似

冰壺忽朝破屋風吹倒且喜家中事事無

洪州萬壽宮內外有井萬曆庚子冬罹于火宮  
宇灰燼井皆塞工人濬之先及內井窮底得  
鐵索子莖圍寸餘連環不知所止次及外井  
亦然一時觀者如堵許旌陽識云鐵索繫洪  
州此足徵矣

鮑仙者不知何許人精相法欲相人時先于幽  
僻處潔地以坐時以手畫空密爲符咒坐三

七日有氣從土中起至三七二十一日則氣  
出與人齊至七七四十九日則氣作五色遍  
空瀰漫乃從氣中出以相人榮枯壽夭萬不  
失一鮑嘗遊贛州有盧子占者師事之能傳  
其術

南城方文學覺之家供養一異人往來四五載  
每方所舉念立致如響一日偕出游方偶忘  
携扇欲歸取之異人曰無庸因取麥藁數莖

納袖中出視則儼然扇也精美異絕值可五  
百文至今方寶藏之人或邀燕會欲命歌伎  
侑觴則以袖從空中拂之卽有麗人一二携  
樂具至皆國色隨所命新聲無不諧譜出且  
歌喉宛轉音嫋嫋動人但去人尺許可望不  
可親耳方里中時疾大作懇異人救之乃于  
人踪稀僻地爲合丸藥有麗人從空降異人  
曰可爲我作每丸以一分重爲率須臾稱如

一可耳麗人唯唯操作亡何異人取丸藥視之叱曰噉若無得輕重其手何不用命之甚也卽揮去更以袖從空招半响有變童三五至異人命之如前諸童以目視手皆作矜慎狀製成隨手取數丸稱之重皆一分以投諸篤疾者服之立起矣嘗有信豐僉生來與游久之告歸異人曰君橐中無剩物何以爲歸計我有微意相贈但不能多耳卽于傾銷匠

舖取鐵尊以唾畫之欲携去其人有難色曰  
不妨我自重價售若耳乃携至一園中掃地  
下落葉燃之少頃鐵鎔卽得白金一兩餘重  
乃以三百文售匠以七百文有零付僉作歸  
資此天啓年間事

薌溪柴文學尼孫有一家傭仙風道骨而善藏  
不露貌樸甚口訥力作不辭瘁柴顧不知其  
爲仙也以常傭視之自若一日尼孫尊人方

與客奕局且輸傭偶在旁指點一二著遂轉  
勝對奕者請與之奕則謝不能強至再三終  
謝不能柴猶不以爲意也一日令往所親家  
值大水無舟可渡乃從浩淼中浮以過見者  
咸謂其溺死卒還家無恙柴亦不以爲意也  
第愛其勤敏嘗以家婢配之絕無伉儷歡其  
妻亦不知其爲仙也每言之初不作荅傭於  
其家者數年許忽一日謂妻曰我期滿當告



去矣將筆硯來我作一書謝主人去遂援筆  
爲長翰頃刻立就文情藻麗書法瀟灑書中  
有戒柴長公者云他日不免藍關之厄後竟  
如言其他道本家未來事亦往往奇驗余數  
從尼孫請書觀尼孫尚秘而未出也他日終  
當請之以傳世耳

丁卯春三月魏忠賢誕日公卿臺省皆稱觴爲  
壽忽有一道人幅巾市氅藤杖塵拂踵門求

見聞者叱之曰幾許元老鉅卿竟日竚候不能接見笑汝一遊食之徒如何便欲見我千歲乎亟走當免汝責稍遲遭亂挺道人曰我與魏公貧賤交今日覲面一言爲壽千秋也聞者不敢報以瓜椎斧鉞指其頭顱而詈逐之曰汝輒敢狂言無忌幸今壽日若他時當膏此耳道人以杖叩鼓衆皆失色隨擁之進稟云此道人求見不容擅自擊鼓致犯天威

道人長揖厲聲曰與公久別今日復得相見  
于此公今富貴極矣寧相忘耶忠賢大怒曰  
妖道何其肆妄我豈與汝交乎叱左右縛付  
鎮撫司嚴究道人曰我風鑑一世閱人多矣  
獨不識汝盜賊其形虎狼其心乎第欲挽回  
以全忠臣義士之多命也一手指天曰汝能  
欺君欺人彼蒼可能欺乎吾當看汝寸磔殆  
狗彘不食汝餘也汝豈能殺我耶將身振躍

綁索俱斷兩袖拂空清風驟至舉座咸驚萬  
地不見